



- E Adam? Ce i contio a Adam?
- A Adam? Ma, Eve, ci distu? Tu ti tiris sù la cotule e vie lui Adam cul cjâf a nolis!
- Ma cuale cotule! Culì o sin intal zardin, sior sarpint!
- Bon, bon, se no tu âs cotule, tu sâs ben tu ce maniere faiale nasâ, lis feminis a san une plui dal diaul!
- Dal sarpint.
- Si, dal sarpint. Alore vele ca la pome, viot ce biel meluç, dut lustri, al ti dîs mangjmi!
- Ma al è chel proibît!
- Ma sveiti un pôc! Nol vûl, lui là su, nol vûl che o mangjais chest meluç dome par vie che o diventais compagns di lui, se lu mangjais!
- Come lui?
- Sì. Eternis! Sù, dâi, mangje!
- Eternis...
- E daimo! Mangje, muardilu, dai, po!
- Va ben, va ben...
- Sù po!
- E il curtis?
- Eh?
- Dulà isal il curtis?

- Ce curtis, ce ti saltial sù? Cruste, tu âs pûr biei dincj!
- Ah, sint mo, siôr sarpint, stami ben a sintî: jo il meluç ti lu mangj. Ma o varai ben di spelâlu, no?!
- Ma par ce fâ? No viodistu ce biel lusint che al è!?
- Propite par chel! Cuissà cetancj glifosâts che tu i âs butât intor par fâlu vignî cussì lustrî!
- Glifosâts? Ma no! Nol è incuinât, tal siguri jo, al è gjenuin!
- Possippò! O varai di fidâmi di un sarpint cumò!
- Di un diaul.
- Di un diaul! Se tu vevis chê di tentâmi, tu podevis ben pensâle di puartâ cun te un curtis! O ben tu podevis fâ di mancûl di inventâ i glifosâts! Aio jo di insegnâti il mistîr a ti?! O curtis o nuie!

*E Eve si refudà di mangjâ la pome cence spelâle!*

*Bon di chel!*

*Si impensaiso se le ves mangjade? Al creatôr i vares montade sù la futare! Al vares maledide la Tiere, i vares vosât a Eve che al vares fat cressi lis dois des sôs gravidancis e che e varès parturîts i siei fruts intal dolôr! E a Adam che al varès scugnût tirâsi fûr la bocjade a fuarce di vitis e che al varès scugnût mangjâ la jerbe dai cjamps e che insom di dutis lis sôs faturis al sares tornât inte tiere di dulà che al jere jessût!*

*Insume nus varès tocjât, a ducj nô, nus varès tocjât di murî! Pensait vualtris!*

*Bon di chel che chê storie dal incuinament e dai glifosâts i à fati vignî a Eve chê biele idee dal curtis!*

*Nus à salvâts l'incuinament! Nus à salvâts i glifosâts!*

**di Laurin Zuan Nardin**